

Uunga siunnersuut: Aalisarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx.xx 2011-meersoq

(Piginnittuunermut tunngasut kiisalu pisassiissutit qaffasinnerpaaffissaannik killiliinerup allanngortinnissaat)

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerinninneq

Aalisarneq pillugu inatsisip allanngortinneqarnissaanik siunnersuut matumuuna Naalakkersuisut sinnerlugit saqqummiutissavara.

Aalisarneq pillugu inatsimmi § 6, imm. 3, nr. 4-p atorunnaarsinneqarnissaa siunnersuutigineqarpoq, taamaasillunilu ukiuni kingullerni marlunni isertitat ikinnerpaamik affaasa aalisarnermiit isertitaasimanissaat piumasaqaataajunnaassalluni.

Tamatuma saniatigut sinerissamut qanittumi aalisarnermi pisassiissutit qummut killingisa 10 %-init 15 %-inngortinneqarnissaat siunnersuutigineqarpoq. Aalajangersagaq taanna aalisarneq pillugu inatsimmi § 15, imm. 4-imi takuneqarsinnaavoq.

Siunnersuutini Naalakkersuisut makku pingaarnertut anguniarpaat:

- Sapinngisamik pisortanit tapiissuteqarfiunngitsumik aalisariutinik sinerissamut qanittumi aalisartuusunik nutarterinikkut aalisartut ataasiakkaat isertitaqarnerulernissaat.
- Aalisarnermik ingerlatsinermi isertitaqarnerulernissaq taamatullu pisuussutinik atuinermi erniat annertunerulernissaat.

Naalakkersuisut aalisarnermi tunngaviusumik atugassarititaasunik pitsanngorsaaniarnerannik, kiisalu sinerissamut qanittumi aalisarnerup ilusaata sapinngisamik inuiaqatigiinnut iluaqutaasussamik naleqqussarneqarsinnaalernissaanut periarfissiiniarnerannik siunnersuut tunngavilersuuteqarpoq.

Aalisarnermik ingerlatsinermi pitsaanerusumik isertitaqarnissaq Naalakkersuisunut pingaartinneqaqaaq. Taamaattumik Naalakkersuisut isumaqarput sinerissamut qanittumi aalisarnermik ingerlaavartumik pitsanngorsaasoqannginnera aningaasaqarnikkut imminut napatissinnaasumik aalisarnissamut akornutaasoq, tassami aalisariuteqarnerup nutaanngilisimasup ilisarnaatigisaanik aserfallatsaaliinermut aningaasartuuterpassuaqarnikkut pisuussutinik iluaquteqarnikkut aalisartunut inuiaqatigiinnullu iluanaarutaasumik unammillersinnaasumik aalisalerniarnermut periarfissat akornusersorneqarmata.

Aalisarnermik ingerlatsineq siuarsarniarlugu Naalakkersuisut taamatut siunnersuuteqarnikkut siunnersuutigaat angallatinik annerusunik aalisarluarnerusunillu unammillersinnaasumik aalisartoqarneq siuarsarniarlugu sinerissamut qanittumi aalisariutit pisariaqartinneqartumik nutarterneqarnissaannut ajornannginnerusumik aningaasalersuinissamut periarfissaqassasoq.

Tassunga atatillugu allannguutissatut siunnersuut tassungalu nassuiaatit innersuusutigaakka.

Inatsimmik allannguinnissamut siunnersuut Naalakkersuisut maanna Inatsisartunut saqqummiussaata sulinerup immikkoortora siulleq, kingusinnerpaamillu 2012-imi Naalakkersuisut immikkoortup aappaanik ima pingaarnertut imaqartumik saqqummiussissapput:

1. Raajarniarnermi kinguaariit nikinnissaannut ajornartorsiuteqarneq.
2. Nunat allamiut piginnittuusinnaanerannut tunngasut.
3. Tulaassisussaataaneq.
4. Pisuussutiniq atuinnermut ernianut tunngasut.
5. Sinerissamut qanittumi aalisarnernerup avataanilu aalisarnernerup immikkoortinneqarnera.
6. Pisassiissutiniq pigisat atorunnaarsinneqarsinnaaneranni piffissarititaasoq.

Tamatuma saniatigut oqaatigissavara Naalakkersuisut inatsisissatut siunnersuummut matumunnga peqatigitillugu aalisarnermi suliniutiniq arlalinnik aallartitsimmata:

Raajarniarnermik aqutsinissamut pilersaarut Naalakkersuisut siorna aasakkut akueraat. Avataani saarullinniarnermik aqutsinissamut pilersaarut maannakkorpiaq tusarniaassutigineqarpoq, taamatullu aamma sinerissamut qanittumi qaleralinniarnep malittarisassiuunneqarnissaa siunertaralugu tusarniaaneq naammassineqaaqqammerluni. Taakku tunuliaqutaralugit Naalakkersuisut ukioq manna aalisarneq pillugu inatsimmi maanna atuuttumi periarfissarititaasut atorlugit suliniuteqarniarput.

Tamatuma saniatigut Naalakkersuisut avataani raajarniarneq pillugu aningaasat kaaviiarnerat pillugu siullermik misissueqqissaarput immikkoortup aappaani suleqqinnissamut ilaatinneqartussamik.

Taamatut oqaaseqarlunga allannguutissatut siunnersuut Inatsisartunut suliassanngortippara.